




Nov. 1 nungi gari tejen
nem totzü magütsütsü

Alimai 'emperor' maginer:
Brazil Tir Lula-i Trump aitsü



Nagaland sorkari 5 Tribes CoRRP dang atasatsü ayongzüker

Dimapur, Chiteni/July 08

(TYO): Naga nunger kin tulu pongu agi kumtetba Committee of Review of Reservation Policy (CoRRP) ajanga Nagaland Civil Secretariat, Kohima nung July 9, 2025 nü mener longkak aitsü sentong yanglua aliba nung langzüa Nagaland sorkari sangdong ka agütsüogo.

Nagaland Chief Secretary indang office nungi sangdong ka agütsüba nung, sorkari iba ken o ya June 3, 2025 nü senden amendang jembiogo, ta ashi. Deputy Chief Minister (Home) mendenpuba sür amenba senden nungya 5 Tribes CoRRP ketdangpurtem aser kin pongu nungi lokti tentet temaba nungi dena liasü. Iba senden nung ken

o ya State Cabinet dangi abentsü ta jembi.

Iba sülen June 12, 2025 nü State Cabinet ajanga sorkar mapa nung Reservation Policy indang inyakyim ajunga asadangsü asoshi Commission ka tentetsü jembia liasü. Ajisür Cabinet-i tuyuba ama Personnel & Administrative Reforms (P&AR) Department ajanga nungdakba maparen temulung agüja inyaka arutar, ta sangdong ajanga ashi.

Iba maparen tang teinyakdak alinungji, state sorkari 5 Tribes CoRRP dang longkak aitsü sentong yanglua aliba soita atatsü ayongzüker. Tim yimya nung iba ken o bentetsü asoshi sorkari bendanga agütsür inyaker, ta sangdong ajangasa ashi.

Dimapur nung tzümetsüng agi nüburtem maneni timtemtar

Dimapur, Chiteni/July 08

(TYO): Dimapur nung nüburtem maneni tzümetsüng agi timtemer, aser Hombar aonung tzunglu kanga sashia aruba sülen Assam den arütsülen ali telemok aika nung tzümetsüng adoka liasü.

Nagaland-Assam arütsü nung aliba Lengrijan, Bor Lengri aser Riverbelt colony densema tesem aika nung ayong nungi tzu muteta adoka metsünga liasü. Arütsülen aliba nüburtem tzümetsüng nungi kumzüksü asoshi SDRF personnel tem yok.

Ajidang masü, Dimapur jila telungzük nunga tesem aika tzu agi metsüngbanga nüburtem pei ki yutsür ainshitsüsa akum.

Mongulbar nikongdang Advisor, Labour, Employment & Skill Development, Excise aser Chairman, District Planning and Development Board, Dimapur,

Moatoshi Longkumer den Deputy Commissioner, Dimapur aser Chairman DDMA, Tinojongshi Chang aser ketdangsür temi tzümetsüng agi kongshir aliba tesemtem semdanga liasü.

Dimapur nung tanen makai tzümetsüngba ya nisungi yangluba teraksa lendong lir, koba nisung temi pei agitsü bilema tali arishiba aser public civic responsibility maliba nungi adok, ta Advisor Moatoshi Longkumer-i ashi.

Dimapur nung tanen makai tzümetsüngba tebilemtsü kottetsü asoshi solution tajung nungdaker ta pai ashi.

Iba tebilemtsü bentettsü asoshi ajaki meranga inyaksü nungdaker ta pai ashi aser nüburtem dang ozüing shidak amshitsü aser kilentzü aoba lenmangtem temulung agüja müreksü ajungshia liasü.



Manezhnaya Square, Moscow, Russia nung tang telidak Bharat Utsav - Festival of India nung Nagaland Stall lapoka alidak Nagaland nungi entrepreneurs tem July 7, 2025 nü tangokba noksa ka yangi angur.

Nagaland aser Japan tesendaktep akangshir; MoU zülutep



Chief Minister, Dr. Neiphiu Rio den Nagaland delegation aser Japan nunger ketdangsürtem Embassy of India, Tokyo, Japan nung MoUs zülutepba sülen tangokba noksa ka yangi angur.

Dimapur, Chiteni/July 08

(TYO): Nagaland Chief Minister, Dr. Neiphiu Rio-i India aser Japan tsungta puti otsü aser sobaliba nung tesendaktep aliba maneni jangjashija linük ana democratic values, tamangba yimsü, yimjung aser meimchir asoshi bendanga agütsüba nung tesendaktep tajung lir ta ashi.

Tokyo nung ketdangsürtem den senden aser sentong balala nung jembidang Dr. Rio-i Nagaland aser Japan nüburtem tsungta tesendaktep balaka aliba indang rateta ashi aser, "Asenok puti otsü aser tajangshiba basa aliba ajanga tesendaktep balaka atema tamendak dak yuja lir. Tanü asenoki tesüiba mapang bilemtetba kisüing masü - asen lanur aser tarutsü putu asoshi yimjung aser terenlok yanglutsütsü asoshi asenok teka amteper inyaker," ta ashi.

Pai Tokyo nung aliba Embassy of India dang pelaba lemsatep aser Ambassador H.E. Sibi George aser par team ajanga shilem tajung agia Indian states aser Japanese prefectures tsungta sendaktepdaksüba asoshi tenüsang agüja liasü. Pai Embassy indang inyakyim ya tatishitsü tajung aser Indo-Japanese tesendaktep ulushiba nung tongtipang lir ta ashi.

"Alima den teka amteper inyaksü Nagaland renema lir. Ozü lanurtem yongya lir, ozü nüburtem dak sempet lir aser ozü sorkari tarutsü nung rangloker tajunglen sendakteptsü asoshi bendanga agütsür inyaker. Japan-i teti Nagaland nung special partner angutsü," ta pai ashi.

Iba mapang tongtipang senden aika amen aser Kochi Prefecture den Japan nung Naga

nunger lanur asoshi human resource exchange, employment opportunities, capacity building aser agri-technology transfer nung rangloker Memorandum of Understanding (MoU) zülutepa liasü.

Nagaland nung aliba stakeholders den lungjemer maparen balala inyakba nung yariteptsü asoshi ARMS Incorporation aser IDAN tsungta MoU ka zülutepa liasü.

Dr. Rio-i Nagaland nung aliba Centre of Excellence for Foreign Languages indanga rateta ashi, kong lanurtem nung Japan nunger oshi aser yimya angazükdakja training agütsür.

Senden ajunga nung Embassy of India nungi ketdangsürtem aden aser Government of India nungi teshimtet ketdangsür temi yaritepa liasü.

Assam transport workers tem ghonda 24 longkak aitsü

Guwahati, Chiteni/July 08

(Agencies): Assam nung motor transport workers temi July 9, 2025 anepdang 5:00 ako nungi tenzüka ghonda 24 'Chakka Bandh' longkak aitsü sangdongogo. Central sorkar indang policy balala anemba central trade unions aser federations ajanga linük tesem ajunga nung longkak aitsü ayongzüka nung shilem ka ama Assam nunga iba sentong ya ayongzüker.

Iba strike yagi Assam tesem ajunga nung nüburtem senzüsempongba nung timtem ajurutsü, kechiaser buses, taxis aser danga commercial gari tem iba mokdang mapang lenmang nung mesenzütsü amai lir. Anogoshi item gari nung senzüsempongertemi iba timtem tali tejangjaba metettsü.

Iba longkak aitba ayonger trade unions temi timtem balala

lemsatepba rongnung Motor Vehicles (Amendment) Act, 2019 ya ka lir. Parnoki ashiba agi, traffic ozüing nung aibelenba atema temerenshi tulu dener benokba ozüing yagi driver tem tim masüba nung khuret tali agütsür.

Item senchi ajanga senotsü nung timtemba yong transport workers aikati mapa yutsüogo ta union ketdangsür temi ashir.

Ano union temi maginüba ozüing kaji Bharatiya Nyay Sanhita indang Clause 106(2) nung shia aliba ya lir, koba dang parnoki "Hit and Run Act" ta ajar.

Driver temi tensa mazüokteti liaka accident ajurur aliba driver tem asoshi iba clause yagi temerenshi tesashi agütsür ta parnoki ashir. Ketdangsür temi iba clause ya reprangshitsü ta shia liaka tang tashi kasa lir ta union züingsem temi ashir.

Longkak aita aliba transport

workers temi ano mapang talangka nungi workers aser kinunger asoshi pension schemes, health benefits aser shisaliok tsütsü teyari densema social security mera balala atema khangha aliba parnoki maneni leshir. Item takhangba ya sorkari tang tashi temulung agüja merepranger ta ashir.

Tang policy melenshiba ya public transport systems tashi meiti kumdakja nija aser 'corporate players' asoshi lenmang lapoktsütsü nükjidong nung lir ta union lenirtemi aitsür. Iba mokdang ya parnok temeden, takum alitsü aser akum wazüka ayutsü asoshi yimjung nung noksakba lir ta ashi.

Iba bandh ayonger temi Assam nung nüburtem dang transport workers aser working-class nüburtem bhukuma iba bandh nung shilem agitsü ayongzüko.

Sumi nungertem Tuluni benjung amung



Dimapur, Chiteni/July 8 (TYO): New Ministers' Hill, Kohima nung Sumi nungertem July 8 nü 35buba Tuluni benjung New Ministers' Hill, Kohima nung mungogo, kong taoba MLA, Pukhayi Sumi-i lokti dang manene longjemer alitsü, aria bilema taochi benshitsü aser longjemer renloka aotsü ayongzüka liasü.

Sentong nung o jembiba mapang Pukhayi-i, iba kiyong nung Sumi nunger mezünpurtem nem tetushi agütsü, shirnoki lokti tashi tait ka yangertsü atema nükla tajung yur inyakogo. "Tanü ya benjungtepba anogo ka aser iba kiyong nung Sumi nungertem atema nüngshilong azünga toktsürtem nem tenünsang agütsüba anogo ka lir. Asenoki parnoki aremzüka inyakba, parnok shisatsü aser tejakdangi aoba lokti ka yangertsü atema bendanga agüja inyakba tushir,"

ta pai ashi.

Paisa, kiyong nung alirtem longjemer aliba ajanga kümtem tsüngda iba lokti tejakdangi ogo, ta ashi.

Lanurtem dang tsürapurtem tsüngsü nung anidaktsü ayongzüka Pukhayi-i, lokti dang maneni longjemer alitsü, mulungsoa agütsüteptsü aser kati ka yariteptsü ajungshi. "Asenoki maneni kati ka nongita yaritepti, temeim taochi sayutepti aser tarutsü pututem tajungba ka asoshi maneni teka amteper inyakti," ta pai ashi.

Kasa mapang nung Tuluni benjung indang jembiba mapang Er. Hutoshe Awomi-i, lanurtem nem sobaliba aser libaliro angazükdaktsütsü asoshi tsürapur shilem koda tongtibang iba indang lemsatepa liasü.

Paisa, sobaliba aser tamangbatem wazüka ayutsü atema putu ka nungi putu ka ta shisatsü belentepa aotsü ya

kanga tongtibang lir, ta ashi. Kasa mapang nung pai lanurtem dang sobaliba inyakyim nung yakyaka shilem agitsü aser tanü asüng putu den sütepa aintsü aser item sobaliba ya mesamadaktsüi bener aotsü ajungshi.

Benjung sentong nung Nilokali Rochill aser medemertemi ken ka aten aser tetsütemi Tishele saya liasü. Maneni Lejole, Akhetsu Kuzu aser Itsani amala sobaliba ken aser sentongtem ajanga benjung tali mera ketdaktsüba den Sumi nunger takar sobaliba sayua liasü.

Iba sentong ya Chairman Sumi Community New Ministers Hill, Obed Sheqi lenisüba nung agi. Sentong nungsa New Ministers' Hill nung Sumi nunger lokti tentet atema 2025-2028 tenure asoshi ketdangpur tasen shim. Iba team tasenba ya Tokugha Yeptho mendenbuba sür inyaksangshitsü.

Kohima nung State Handloom Expo 2025 tenzükogo



Kohima, Chiteni/July 8 (TYO): Aatmnirbhar Bharat Utsav kübok hopta ana atema State Handloom Expo 2025 (Hathkargha Mela) Gorkha Public Panchayat Hall, Chandmari, Kohima nung tenzükogo.

Iba expo ya Nagaland Apex Weavers & Artisans Cooperative Federation (WEAFED) Ltd., Dimapur-i ayongzük aser Development Commissioner (Handloom), Ministry of Textiles, Government of India, New Delhi-i senotsü teyari agüja agidar. Iba expo ya "My Handloom, My Pride," omen nung ajemdaker agidar aser July 21 nü tashi agitsü.

Expo lapokba sentong nung o jembiba mapang WEAFED Ltd. Managing Director Gwaruno Khing-i sentong nung shilem agirtem dang jenjang aketba oset yanglutsü ajungshia liasü. Paisa, branding aser market awareness ajanga international shishilembadak local osettem ajungkettsü atema Centre sorkar rangloker lir, ta

ashi.

Khing-i ashiba agi, iba expo ayongzüka agiba nükjidongji, sü ataker aser artisan tem nem parnoki yanglutetba oset sayatsü, ayoktsü aser tanga shishilembadak tuluba den sendakteptsü atema sabang ka agütsütsü asoshi lir.

Paisa, upgraded looms, accessories, aser subsidized yarn agüja handloom sütakertem ajungkettsütsü nükjidong nung iba expo ayongzüka liasü, ta ashi.

Managing Director-isa,

sütakertem aser artisan tem nem takokba tashi teyari agütsütsü atema department bendanga agütsür lir ta ashi, kong parnok tasa arangtetshitsütsü aser machinery tem agütsütsüba densema lir.

Taküm iba expo nung Nagaland aser Assam nungi sütaker aser artisan 60-i parnoki atakba sü aser oset balala saya-a yokdar aser iba den tanga shishilembadak balala den sendakteptsü aser shishilembatsü atema maongka tasentem bushidar.

Survey General den virtual consultation senden mapa melenshir

Dimapur, Chiteni/July 8 (TYO): Wokha District Administration-i sangdong ka ajang, Additional Surveyor General, Eastern Zone, Survey of India, Kolkata den virtual consultation amentsü atema mapang lateter aliba melenshiba metetdaktsüogo.

Senden ya mezüngbo July 10 nü (Brehostibar) 1:00 ako nungi tenzüka amentsü liasü, saka

tang kasa anogo 12:00 ako nung amentsü ta metetdaktsüogo. Iba senden ya virtual mode nung agitsü aser senden indang link balaka lemsateptsü ta kasa sangdong ajanga metetdaktsü.

Ken o dak sendaka aliba department aser ketdangsür ajak dang iba senden nung tamakok maludanktsüi shilem agitsü mepeshia metetdaktsüogo.

TE department-i metetdaktsür

Dimapur, Chiteni/July 8 (TYO): Technical Education (TE) Department-i sangdong ka ajanga, NEET-(UG) candidate shirnoki 2025 academic session atema MBBS/BDS & Allied course balala agitsü asoshi form benokogo, parnok dang Nagaland state indang NEET Merit list Department website: www.dte.nagaland.gov.in nung Directorate of Technical Education, Nagaland, Kohima nung malokja aliba metetdaktsüogo.

Candidate tem dang merit list nung candidate tenüng, tebu

tenüng, NEET score aser ST rank tem amala osang agüja aliba kanga junga reprangshitsü metetdaktsüogo.

Aibelen kar danga lir candidate tem dang osang tejangja July 10 nü tashi nungbo office mapang agütsütsü metetdaktsüogo. Atakzüka aliba mapang süitemba sülen temetongshitsü alibatem kecha magizüktsü, ta kasa sangdong ajanga metetdaktsü. State atema mekazüka aliba mendentem atema candidate tem shimba aser nomination ya mapang tatong nung metetdaktsütsü, ta sangdong nung shia lir.

Kumla Makeup Studio & Academy lapok

Mokokchung, Chiteni/July 8 (TYO): Tongdentsüyong Ward Mokokchung nung tanü Makeup Artist Kr.Moakumla-i "Kumla Makeup Studio & Academy" lapokogo.

Mokokchung nung Makeup Studio-bo aika lapoka lir saka Academy-bo tan Kr.Moakumlai lapokba ya mezüngbuba asütsü.

La ya iba mapa nung kanga dang mongin ka lir. Lai lanur asüadang nungi fashion aser beauty ya kanga dang meima aru aser la inteter kelen Annalia Academy, Dimapur nung Makeup Artist professional course agi aser iba sülenjibo maongka aika ngua Beti Bachao Beti Padhao sentong kübok Noklak nung workshop ka nung shisa sayur ka ama oa aden. Aser ano la SM Academy Bangkok nunga Makeup



Artistry Internationally Recognised Course agi.

K r . M o a k u m l a i lapokba "Kumla Makeup Studio & Academy" nungya Makeup techniques balala sayutsü aser certificate-a agütsütsü.

Iba academy 2025 July 14 nungi tenzüktsü aser angazüknertemi 6909095441 nung tongteprateptettsü.

Teachers' Award indang metetdaktsü

Dimapur, Chiteni/July 8 (TYO): Nagaland Board of School Education-i, NBSE kübok züngoksema aliba school tekolaktem dang, Department of School Education & Literacy, Ministry of Education, Government of India, New Delhi-i National Teachers' Award 2025 atema temsüa aliba candidate tem shimtsü asoshi tesayurtem dang peisasa nominate asütsü jaokba metetdaktsüogo. Iba tetushi ya September 5 nü Teachers' Day amungba mapang India tir-i Vigyan Bhawan, New Delhi nung agütsütsü.

NBSE kübok Institution tem nungi tejangrar aser temsüa aliba tesayurtem dang Ministry

of Education indang official portal ajanga nomination benoktsü metetdaktsüogo. Nomination atema portal ji h t t p s : / / nationalawardstoteachers.education.gov.in asütsü. Nomination ya June 23 nungi July 15 tashi asütsü.

Ken o dak sendaka alir dang iba osang ya parnok institution nung aliba tesayurtem nem agütsütsü aser temsüa aliba tesayurtem iba nung ya shilem agitsü ajungshitsü metetdaktsüogo.

Osang tejangjaba agitsü atema nomination portal nung inokja aliba user manual r e p r a n g d a n g t s ü metetdaktsüogo.

Nagaland House Delhi atema ketdangsür nominate süogo

Dimapur, Chiteni/July 8 (TYO): Right to Information Act, 2005 kübok Section 5(1) & (2) aser Section 19(1) dak ajemdaker Nagaland House, New Delhi Resident Commissioner office atema Appellate Authority (AA), Public Information Officer (PIO) aser Assistant Public

Information Officer (APIO) ama Sharon Longchari, Joint Resident Commissioner. (rcnagalandhouse@gmail.com), Anup Singh Rawat, Registrar (Anuprawat70@yahoo.com) aser Loipong Konyak, S u p e r i n t e n d e n t (Loisk2012@gmail.com) nunger shimogo.



July 08, 2025 nü Shimla nung Himachal Pradesh Congress Tir, Pratibha Singh-i taoba mapang state chief minister Virbhadra Singh asüba anogomong nung asür nem akhüm agütsüba noksa nung angur.

AAIB-i AI tayimtsü tsükokba report agütsü

New Delhi, Chiteni/July 08 (Agencies): Mongolbarnü Aircraft Accident Investigation Bureau (AAIB)-i Ahmedabad nung Air India I171 tayimtsü tsükokba report mezüngbuba shilem Ministry of civil aviation aser tim ketdangsertem nem agütsüogo.

B u s h i s ü n g d a n g b a mezüngbuba shilem mapang nung bushitetba osangtem iba report nungji lir, ta osang ka ajanga metetdaksü.

Ano külen Mongolbarnü Parliament's Public Accounts Committee (PAC) senden menogo, aser iba senden nungji Civil aviation secretary aser Director General of Civil Aviation (DGCA) na densema Civil aviation ministry nungi tongti ketdangsertem aika aden.

Iba senden nungji

Ahmedabad nung Air India tayimtsü AI-171 tsükokba indanga jembi.

Public Accounts Committee senden nungji taoba mapang Civil Aviation Minister aser PAC züngsem, Praful Patel-i tayimtsü lendong nokdangtsü atema lemsatepba den külemi India aviation watchdog, Directorate General of Civil Aviation (DGCA) nung staff tem kanga ajema aliba lemsatep. Iba senden ya Congress lenir KC Venugopal lenisüba nung agi.

Senden tembangba sülen osangbenertem den jembidang Praful Patel-i, India nung aviation sector jenjang junga dang lir, ajisüaka khuret tuluba akümba ama ano mongintem aika nüngdaker, ta metetdaksü.

"Ahmedabad nung tayimtsü tsükokba sülen tongtiban onük

aika jembia arudar. Tayimtsü nung senzürtem kümzüka alitsüji tongtiban. Tayimtsü nung senzürtem kecha marendaki senzütsü nüngdaker aser timtem kecha majurui peipei tesem atongtsü nüngdaker," ta paisa metetdaksü.

"DGCA jenjang junga lir, ajisüaka temaba jenjang nung nübo ajema lir. Mapa nungi anisüngzüker alirtema kümsük tatsüka atema anioktsü akok. Itemji ajanga tayimtsü nung senzürtem munglung koktettsü," ta paisa shisem.

June 12 nü London-i apusoba Air India Boeing 787-8 tayimtsü Ahmedabad nung aliba Sardar Vallabhbhai Patel International Airport nungi apusor minute ka majungdang tsükoka liasü.

Nov. 1 nungi gari tejen nem totzü magütsütsü



New Delhi, July 08 (Agencies): July 1 nungi tenzüka Delhi nung küm 10 dak tali tejen diesel garitem aser küm 15 dak tali tejen petrol garitem nem totzü magütsütsü tenokdangba benoka liasü, ajisüaka Delhi sorkari iba tenokdangba ya khenpiga agiena atatsü mepishiba nung ajemdaker iba temepishiba agienogo.

Mongolbarnü Commission for Air Quality Management (CAQM) senden amenba sülen

parnoki, taküm November 1 anogo nungi tenzüka gari tejen nem totzü magütsütsü, aser iba ya National Capital Region (NCR) kübok district pongu nung benoktsü, ta metetdaksü.

Delhi sorkari shidi ka ajanga End of Life Vehicles (EOL) garitem nem totzü magütsütsü tenokdangba ya agiena atadaksüner, ta mepishia liasü.

"EOL garitem atema 'No fuel scheme' ya November 1 nungi Gurugram, Faridabad, Noida, Ghaziabad aser Sonipat

nung benoktsü," ta CAQM-i metetdaksü.

Amongnü Delhi Lieutenant Governor, VK Saxena-ia shidi ka ajanga Delhi sorkar dang iba tenokdangba ya agiena atatsü metetdakja liasü.

Iba ama tenokdangba atema nüburttem renema mali, ta Delhi Lt. Governor-i Delhi Chief Minister Rekha Gupta nem metetdaksü.

Anogo ishika tejaklen Delhi Environment Minister, Manjinder Singh Sirsa-i CAQM dang Delhi nung EOLs garitem dang totzü mayokba tenokdangba ya agiena lidaktsüner ta mepishia liasü.

Sirsa-i shidi ka ajanga CAQM dang, tang-tangbo iba tenokdangba ya mapa küma benoktsü makok, kechiyong Delhi-NCR tesem ajaklen Automatic Number Plate Recognition (ANPR) system junga merenem tashi iba tetuyuba ya agiena lidaktsüner ta metetdakja liasü.

Rafale jet ka sama saka Operation Sindoor mapang samaba masü

New Delhi, July 08 (Agencies): Operation Sindoor agiba sülen ita ana süia aoba mapang Dassault Aviation chairman aser CEO, Eric Trappier-i, Pakistan-i parnoki India nung Rafale tayimtsü aika khazüka yok, ta jembibaji tiyazü ta shiogo.

Trappier-isa, India nung Rafale tayimtsü ka sama, ajisüaka iba tayimtsüji raraba mapang nung samaba masü saka anüng talanglen ayimdang technical timtem ajanga sama, ta ashi.

Pakistan Air Force-ibo parnoki May 7 nü Indian Air Force indang raraba tayimtsü pongu khazüka yok, ta jembir. PAF-i, parnoki Chinese PL-15E missiles amshia India nung Rafale tayimtsü asem khazüka yok ta ashi, ajisüaka parnoki kuli magütsüteter.

Trappier-i, Pakistan-i parnoki Rafale tayimtsü khazüka yok ta jembibaji shidak masü aser India nung Rafale ka samabaji tsükchirtem ajanga masü, ta metetdaksü.

Dassault CEO, Eric

Trappier-i, Rafale tayimtsü nung aliba Spectra electronic warfare systems ajanga iba tayimtsüji raraba mapang nung sama masü ta jangjaogo, ta metetdaksü.

April ita nung Pakistan nungi kiralongrartemi Pahalgam amakba sülen May 7 nü Indian army temi Operation Sindoor kübok Pakistan nung kiralongrar camp 9 amak.

Operation Sindoor sülen China-i Rafale jets tenüng menüktsütsü aser Pakistan-i amshiba China nung raraba tayimtsü tenüng ajungkettsütsü atema campaign tenzü.

Pakistan-i linük balala nung aliba embassies ajanga Rafale tayimtsü tenüng menüktsütsü atema inyak aser tiyazü osang aika proka liasü.

India-i Pakistan aser Pakistan-occupied Kashmir nung kiralongrar camp aika amakba sülen Pakistan-i India nung civilian aser sepaitem kiojentem amak. Iba sülen Indian Armed Forces-i Pakistan nung airbase 11 maakdoka liasü.

Form No. 3 [See Regulation-13(1)(a)] DEBTS RECOVERY TRIBUNAL GUWAHATI Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)
Case No.: OA / 120/2025 Iba Act nung sub-section (4) of section 19 aser Debt Recovery Tribunal (Procedure) Rules, 1993 nung rule 5 kübok sub-rule (2A) nung ajemdaker jaoker Exh. No. 5266 Bank of Baroda - VS - M/S. MILON ELECTRONICS & Anr.
To, (1) M/s. MILON ELECTRONICS Represented by its Proprietor Mr. Tufail Ahmed, Having its Shop at I Zhimomy Market, N L Road, Shop No. 820, Dimapur Nagaland, Pin Code- 797112. (2) MR. TUFAIL AHMED Son of Burhan Uddin Ahmed, 415 New Market, Dimapur Sadar, Dimapur, Nagaland- 797112.
JAOKER 13.06.2025 anogo nung Hon'ble Presiding Officer/Registrar matsüngdang OA/ 120/2025 benoka liasü. Rs. 29,42,294/- sentsüh atema iba Act kübok section 19(4) application nung ajemdaker na anema (OA) benoka Hon'ble Tribunal-i jaoker/notice agütsür (application den documents copies densema lir). Iba Act nung section 19 kübok sub-section (4) nung ajemdaker defendants dang teküboklen aliba tetuyuba agütsür:- (i) Iba case defend asürtemi tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksür; (ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla; (iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar; (iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla; (v) Ordinary business ajanga secured assets mesüra tanga assets aser kiojen nungi yokzüka senjisecurity interest soita aliba bank mesüra financial institutions indang account nung deposit asütsüla. Nü dang tezüluba nung sangdong applicant nem agütsütsü tuyur aser 23.07.2025 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangtsü aser na meliaka telemetba agütsü. For Paper Book follow the following Url: https://cis.drt.gov.in/drtlive/paperbook.php?ri=202540620616 16.06.2025 anogo nung tsünglanglen kü meyongnem den iba Tribunal indang seal agütsür: Registrar, Debts Recovery Tribunal, Guwahati



TIR YIMYIM YIMOBILEM (EDITORIAL)

DIMAPUR

RASEMNÜ

CHITENI 09, 2025

Tzü lenmang lapoktsüba mapang

Alima nung ya nisung dang masü saka shirurutema pei pei jajaba kenmang, terü, kaka lir aser yamaji tzüa la yima aluba lenmang kaka mesempoka ia lir, anungji ayongbang nungi ayonglang tashi nung ayimba tzüji iba lenmang nung ayimer aser tzü ayimba lenmangji ayong kümadoker. Kasaji, arem shirurutem rongnunga, talisa shiti senzüba lenmang terü balaka lir, anungji asenoki iba terüji nokdanga kiojen yanglura, itemjibo shititem jagi bendoktsütsü, kechiyong asenoki parnok lenmang lendi amenbang asütsü. Ibaji mesüka, tzü ya-a taküm lir, iba jagiang tzü mejemiang taküm meliteter. Aji oda, asenoki tzü yimzüka aotsüba lenmangji nokdangadokra, tzü jagi terü balaka bushia maotsü saka yangji atsüngdentsü aser iba jagi tzümetsüng kuma nisungtem timatemer. Tang iba timtemji Dimapur nung tesem aika nung ajurudagi. Tanü iba ama timtem ajurudang ya yimteni pei pei kiyong aser mepu nung tzünglu aruba mapang motzü yimzüka maotsüsa kiojen yanglua alibatem ajak reprangoka yur, tzünglu anenba sülen bendoktsüsa sentong yanglutsüla. Atangji, kiojen tulu talang yanglua alitsüa akok saka itemji mebendokra, küm shia iba temeket nung tang timatempa ama kasa timtem ajurutsü. Aji oda, tangar dang masü iba kidang alirtemjia timtem lendong ajurutsü ana nung lir. Tanga state-tem nungbo senotsü aika liaka, pei alitsü kia pei mulungba nung masür, anungji Municipal nungi dang masü saka government nung department aika nungi temelaba agir külenang pei kia yanglur. Aji oda, tesem ka nung ki tasen ka yangluba agi tzü aolen nokdang asü menokdang, aser ali jagi tizüktetsüsa kiji azüklen koba tashi tua yanglutsüla aser ki yanglur külena kitsükkirong lendong nungi kümzüktetsüsa terenemba ali asü mali ta ajakji jungjunga mita repranger külenang ki asütsüa aser talitsüa melar. Ajisüaka, asenokbo iba amaji repranga kiojen yangludaktsür mali, pei yanglunütsü yangludaktsür, anungji karibo yin tamajung aser cement agi matu ser ki tulu aser talanglang yanglur, itemji menoknok anokdang metettsü. Ano karibo kilentzü aser ayong agi lenden kuma onbanger ki tulu aser talang yanglur, iba ama jagi tanü ama tzünglu arudang motzü taolen maka pei kima nungi tenzüka kidang kiyonger ki dena atsüngbangtsüsa ataloker. Item kitemjibosa bendoktsüla aser yimti nung tesem ajaklen motzü ayongayonga yimzüka aotsüsa kilentzü aser tzü lenmang shitak piboka toktsütsüla. Alima nung küm 5000 jakdang Indus valley civilization mapang alirtem indang otsü azüngdanga parnok lenden lima alirtem yimti yimdong sademba aser tzü matsüngtsüsa kilentzü shitak yangluba indang asenoki azünger. Item denji asenok libaliro, inyakyim aser tangatetba medemdangra, pi küm 5000 jakdang alir kolok aser shisatsüa memenep asenokbo asenoksasa asen lendongi aitsüa merajem aser mangatet ser asen kilem nungi tsükba tzünglu tzüa dena yimzüka aolen maka ki yangluteper. Ano, ajak dang nungi inyakyim aika nung asenoksa tangatetba asütsüba ser nung asenoksa mangatetba aser awashia memetetba sayuba mapatemji asenoki ali nung morumoruba jakla ya asütsü. Asenok aikati asen kidanger li terara atsünga oa agitsü meranger, arr nung süngdong tema yutsür aser asen li ajangba tashi nungbo lenmang lendi dena aseni agiadoker aser kilentzü jungjunga sademsadema yanglua toktsütsü melen yimi yangluba dena nangbanga toktsür. Aji oda, yimti nung tesem kar nung danga ki o ki na tsüngda lenmang temesü lira, aji tangarbo masütsüa akok. Akhidangbo asenoki lokti, yimten aser arogo nem ali dena tenla agütsü saka tangbo yimkong jajaba lenmang dena asenoki atsünga agir. Iba jagi tang ama tzünglu aruba mapang tzümetsüng agi asenok dena timatempa dang nungibo tuluba takoksaji alimai asenok tetlatetshitsüba ya asütsü. Iba maparen nunga asenoki anir temelenshi tajung ka tenzüktetsüba kanga nüngdaka kümogo. Aji oda, asen ki aser asen li ajanga motzü maotsüsa aseni nokdanga lira lapoktsüdi aser government-ia tang ama tzümetsüng agi yimti nung alirtem timatemdang, teti atema anisüngzük angutsüsa tzü lenmangtem nokdanga alibatempo özüng agi lapokyonga aotsüla.

OLEMSABANG

Aor Tar Yimsüyimbong

Wt. Repabenla, Asst. Professor, FAC

(Maneni yashi adok nungi...)

3. Anembong

Tar nisüngtemi kodangsa külemküja asütsüsa mapang arudir parnoki kanga dang anembonga atarang itemji külema aru. Shiri anembong mesütetlir parnokjibo arishi malanger ta angatet nung kanga dang metsünga reta anembong. Asen Aori tekülemba medeni mapa kecha inyaka maru, oda yimra mopung ka sema tokolak tera menü nung iba asoshia tekülemi aotsüsa aküm. Aser kodang tekülemi odir yangji anembong sentaktepa lir. Tatishitsü



ka; kodang nisüng ka arem nungi tera shiranga atokdir pa/la ji süng, lung mesüra meta kar nung tasem mena (tanela apuba) alitsü asü ta tamang mekateti parnoki araki-i aotsü. Itangji pa/la tanela melen agütsütsü asoshi ak, an mesüra azü agütsüdi ta atemzüktsü. Iba tekülem dangji Tatemzük ta ajar. Iba ama külemba jagi shirangbaji aneper ta jembia inyaka aru. Shirnoksia iba tatemzüki odir parnoki anogo asem anembonger. Yamaji tar nunger yimsüyimbongji anembonga retreta benschia aru.

Anogo mapang kwi anembongtsü ibajibo mapa jagi dang sayua aru. Kidang tanur tebur ka sora anogo trok (6) anembongtsü aser tetsür sora anogo pungu (5) anembongtsü aser apuani tsüngta anogo semer (30) anembongtsü ta benschia aru. Yamaji kar sü achitsüsa süra parnokbo küm tepiyong anembonga aru. Anembongba tamaitü kima kiküm mesüra kishi dak süngsem songlokasa ayu. Iba mapangjibo aiener shinga kidangi maniketer aser parnoka shinga aieni maor, kodang anembong abensa-a arudir idangji süngjongji intoktsü ta inyaka aru. Item anembong mapa ajak ya Tiar nem aküm tetushi aguja merükteta külemba ta züngshi.

4. Tsüngrem tapu balala

Akhi alemli asen Aori külemba tsüngrem ya aika liasü. Tenüng teta ajaba tsüngrem tatishitsü agi; Lijaba, Meyutsüngba, Longtitsüngba, ano aika lir. Iba den ano tenüng teta mejaka parnoki süng tulu, lung tulu, tokong tenem, ayongtem ajak madak kibur ka lir ta amanga parnoki külemasa aru. Item tsüngremtem rongnung kar tuluba kar tilaba ta masü saka tsüngrem shiaji pei pei shilem lir ta amang. Tatishitsü agi; Lijaba tsüngrem ta asünung, iba ya alima aser taküm aliba ajak yanglusang tsüngrem ta amang. Anungji, Tar nisüngtemi Lijaba tsüngrem nungi temoatsü meshia kenü retreta pa tushia amung. Lijaba külema amungba anogo ya tanga amung ama masü saka alar anisüngzükba anogo ta-a ajar. Kechiaser iba anogo nung ya mapa teinyaktsü kecha maka, süngben tzüta maotsü, tsük masentsü, shizüng tsüksa tokolak maloktsü, ali matenshidaktsütsü, nokbang majenoktsü, tetsüng agi ali arakzütsütsüsa tashi agi majemshitsü, ali atenshia süng masotsü ta munga aru. Amang o sangwa tsüngta putiri yimdong nung poreppen meintok tashi yimdong nung shinga mesenzütsü. Yamaji Lijaba amungji akangakanga munga liasü.

Lijaba mung amungdang ken yamaisa aten;

Lijaba mung amungdangbo,

Süjin shira abener

Anishi den chiyunglaba.

Ano külen kodang

Ano külenbo Longtitsüngba mung amungdangbo ken yamai aten;

Oh amungdangbo,

Longtitsüngba amungdangbo

Sürem tajung abener,

Shi den chiyunga mungdi ni.

Longtitsüngba ya anüng tsüngrem ta parnoki amanga külema aru. Par yimsüyimbong yimya ajakji kasa masü saka khen khen pelatepa longso tepa shi den chiyungtepa külem aser mapang kabo süjen shira dang abener anüshi den dang chiyunga külema aru. mapang kakabo parnoki junga mekülemtetba agi yipru mopung tesashi arua kiojen aser alu raksatsür ta amanga aru.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Malkangiri nung longkak aitba sülen Khristan 25 anema ken o benok



Odisha kübok Malkangiri nung Khristantemi longkak aitdang tangokba noksa nung angur.

July 08, 2025: July 2 nü Odisha kübok Malkangiri nung longkak aitba sentong ka agiba sülen police-i Khristan lenir 25 den tangar nisung 50 anema ken o benok.

Rashtriya Christian Morcha Odisha unit, Malkangiri District Christian Manch aser Voice Against Hate-i senteper ayongzükbä sentong nungji nisung 7,000 dak temai shilem agia liasü. Iba anogo nungji tzünglu kanga sashia aru, ajisüaka nisung meyrjang aika adenshia longkak aitba sentong nungji shilem agiba sülen parnoki district collector nem temepishiba shidi ka agütsü.

Voice Against Hate Tir aser Congress lenir, Manas Choudhury-i Malkngiri police station nung Inspector Rigan Kindo nem narozük azüksütsü merangba nung mangatettep adoka liasü.

Sub-Inspector Prabhata Gouda-i, longkak aiterem jagi tashiyim amshia tongti gate lapokba sülen district collector office telungi ai, ta metetdaksü.

Iba tatalokba sülen police-i Khristan lenirtem- Manas Kumar Choudhary, Bijay Khara, Rajesh Patra, Rev. Jitendra Khosla, Rev. Debendra

Singh aser Bishop Pallab Lima nunger densema Khristan lenir 25 anema ken o benok.

June 21 nü Matapaka yimdak Khristantem amakba anema July 2 nü Khristantemi ayongzüka longkak aitba sentongji agia liasü.

June 21 nü Matapaka yimdak Hindu nationalist telok balala nungi züngsem 300-i Khristantem sarasadem sentong ka nung timtem agüja liasü.

Aluyimba mongpu atema temoatsü meshia sarasademsü asoshi Khristantem adenshia aliba mapang nung Hindu nungertem arua amakdang Khristan aika yiru aser Khristan 28 bo Malkangiri District Hospital-i anir oa liasü.

Iba sülen anogo ka lir June 22 nü Khristantemi Katamateru yimdak police station nung nisung 22 anema ken o benok, ajisüaka tang tashi nung police-i shinga mapuba agi Khristantem kanga jashia liasü.

Osangbenertem den jembidang Rastriya Christian Morcha State unit General Secretary, Bishop Pallab Lima-i, "Takoksa angurtemji yiruba dang masü saka tang tetsübu

nung alir. Parnoki pei kidangi meyipa aotsü tsübur," ta metetdaksü.

Malkangiri District Christian Manch tatong Tir, Prabhakar Sona-i, "Police-i onok dang parnoki July 4 tashi nungbo tai tonglokja alir ajak aputsü ta shiogo," ta metetdakja liasü.

Osangbener den jembidang Malkangiri SP, Vinodh Patil H-ia, police-i ken o ka benokba sülen bushisüngdang tenzükogo, ta metetdaksü.

Khristan lenir katibo, July 2 nü longkak aitdang mangatettep adoka raraba dak sendakba nung Khristan lenir 25 anema ken o benoka lir, ajisüaka FIR nung tetshia aliba Khristantem lenirtemji aika longkak aitba sentong nungji maliasü, ta ashi.

Paisa, "Malkangiri nung Khristantem anema inyakertem aputsü atema police administration-i meinyaker, ajisüaka tesünep nung longkak aiterem anema dang inyaker. Tesüngmangtsü kaji- longkak aitba sentong nung madener Khristan lenirtem anema-a ken o benoka lir. Iba ya Khristantem amokmerentsü aser ola nembangtsütsü atema inyakba lir," ta ashi.

United States nung Tenla kitem amakba kanga bulua akümer

July 08, 2025: United States tesem ajaklen Tenla kitem amakba kanga bulua kümдар, ta International Christian Concern (ICC)-i metetdaksü.

Taküm April 24 nü Texas nungi tetsür ka, Natasha Marie O'Dell-i lai 2023 küm August 25 nü Snohomish County, Washington nung aliba Seattle Laestadian Lutheran Church (SLLC) Tenla kidang mi senoktsü, ta nangzüka liasü.

Taküm April 3 nüa Arizona nungi Zimnako Salah-i bomb amshia Tenla kitem amaktsü amokmerenba atema aija liasü.

Salah-i Arizona, California aser Colorado nung Tenla ki pezü semdang aser Tenla ki ana nungbo Khristantem tsübudaktsütsü atema 'backpacks' tokja liasü. Yangkhu nungji bomb bo maliasü ajisüaka Salah indang storage unit nungbo improvised

explosive device (IED) yangluba osettem nguteta liasü.

Eastern District of California atema acting US Attorney, Michele Beckwith-i, Salah-i metetsümonga Khristantem anema inyak, ta aitsü.

June 18 nü Virginia nungi Rui Jiang-a küm 25 tepuokdak ayutsü obendang agütsüogo. 2023 küm September 23 nü pai Virginia nung aliba Park Valley Church-i oa prangpong amshia tamangertem khasettsü merang. Jiang-i pai Laishiba rongdokba aser iba Arogo amokmerenba sülen police nem iba osangji metetdakja liasü.

September 23 anepdangji Tenla kidang security-i Jiang soita liasü, iba sülen Prince William County police officers aru. Jiang ket nungji semi automatic prangpong ka,

magazines ana den injang aser kotari ana liasü.

Eastern District of Virginia atema U.S. Attorney Erik S. Siebert-i, "Tenla kidang tekülem sentong tagidak mapang nung tamangertem khasettsü nükjidong nung Jiang iba Tenla kidang jagi oa liasü," ta metetdaksü.

June 22, 2025 nü Brian Browning-i Wayne, Michigan nung aliba CrossPointe Community Church nung tamangertem amaktsü merang ajisüaka Arogo security guards-i pa khaset. Browning ket nungji assault-style rifle ka den magazine kar, semiautomatic pistol ka den magazine aser injang aika liasü.

Browning tetsübo iba Arogo nung züngsem lir aser tesüiba küm ka tsüngda Browning-a iba Tenla kidang tekülem sentong ishika nungbo denogo.

ANOGO ABEN TSÜNGREM DEN

Tebilemtsü Mapa Agiba

Idangji nisung jagi ashi, koba tetsür nai kü den alitsü agütsü, lai iba süngtong nungi kü nem agütsü aser ni achi. Lipok 3:12.

Adam aser Eva nati parnoki temenen inyakba paidoktsü meranga mapa ajak inyak. Adami tebuttsü aitsü: "Lai kü nem iba süngtong nungi kü nem agütsü." Pai Tsüngrem dang temeyong agi tuita, "Nai iba tetsür kü nem agütsü" ta ashi. Evai per nem tai agütsü. "Peri ni ashioktsü, aser ni achi." Tsüngremi parnoki kuli yanglubatem mezüngshi aser parnok tashi mangaba nungi kechi adoktsü iba obendang ka agütsü.

Meimchir tejashitsü kaji parnoki parnok mapa nung tebilemtsüji magizüker. Asenok tebilemtsü asenoki tangar dang dak tongloktsür. Asenok tanishiri junga merepranger, tsüraburi junga mesayu, tembartemi raksatsü, onok pastori junga sayutsüngi masür, tanurtemi tashi mangar, kinungbo- kinüngtsü tsüngda junga tangatetep mali, mapa peria mangur kanga mazüng tatemzükba kuli aika yanglur! Aji saka asenoki asen mapa nung tebilemtsü khuretji magizük tashi tatok agütsüba aser meyipba agizükbaji malitsü.

Asenoki chichiba temulung meyipba mekatetbaji asenok temenen libaliro yimya asoshi tatemzükba kulitem yanglur. Laishiba nung kar menen asoshi Tsüngremi kar nem tongtsüba mangur. Ne O au süra au, nunga süra nunga ta asütsü Tsüngremi mulungba lir. Asenoki asen tamakok kar nem nünglokja ali tashi kodanga chichiba temulung meyipba dangi marütsü.

Tsüngremi asenok mapa züngdangtsü, tangar mapa masü (2 Korint 5:10). Asen menen metetta alitsü aser iba khuret abentsü teti merangang. Iba Tsüngrem nungi tatok angutsü na nüji kümdaktsütsü aser tanela nung tashi itta küma tejakleni awa aotsü.

BJP MLA kati pastor tem dak azüker nem senpet agütsütsü nangzük

July 08, 2025: Maharashtra Council nungi anentsütsüla, ta nung BJP MLA kati, tamangba yimsü meyipdaksütsü atema yimtsüngtem semdangba evangelist aser pastor tem dak zükra pai senpet agütsütsü ta sangdong, ta International Christian Concern (ICC)-i metetdaksü.

Lokti sentong ka nung jembidang BJP MLA, Gopichand Padalkar-i, Khristan tapu balala dak azükba atema senpet agütsütsü, talisa pastor tem dak azükba atema senpet tali agütsütsü, ta metetdaksü.

Maharashtra kübok Sangli district nung arrshi küm 28 mashisa tetsür ka soseta asüba dak sendakba nung Padalkar-i iba o ya jembi.

Tetsürla kinüngbuer tsüraburtemi 'dowry' sen meshia liasü aser Khristan yimsü dangi meyipang ta rongshia liasü, ta tebursanger kinünger nem tai tonglokja lir.

Khristantem anema inyakba atema senpet agütsütsü sangdongba anema jila/yimti aika nung Khristantemi longkak aita MLA Padalkar anema ken o benoktsüla aser tangsa Maharashtra Legislative

Council nungi anentsütsüla, ta takhangba agütsü.

Iba ama nisungtem ya democratic reju ka nung alitsü metemsü, ta Khristantemi metetdaksü.

Jalna jila nunga Khristan lenirtemi temepishiba shidi ka ajanga district collector dang MLA Padalkar anema inyaktsüla, ta takhangba agütsü. Nagpur yimti nunga Nagpur City United Churches Forum-i Police Commissioner Ravindra Singal nem takhangba ishika agütsüogo. Parnoki tangsa Padalkar anema FIR benokang ta takhangba agütsü.

India nung tesempa o jembiba kanga bulua kümдар; talisa yimtenren lenirtemi Khristantem aser Muslim nungertem anema tesempa o jembir.

Yaküm June ita nungi taküm June ita tashi nung India nung tesempa o jembiba ken o 947 liasü, aser iba nungjagi ken o 345 bo Muslim o Khristantem anema tesempa o jembiba ken otem lir, ta Association for Protection of Civil Rights (APCR) aser Quill Foundation nati anogo ishika tejaklen sangdonga liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tepuar

(n) nükshia mesüra meima kümdaktsüba (user of love charms)

* Tepuar kati tepuatsü amshia aiürla pua.

Tepui

(adj) sentsü mebentet, anak auyi sentsü (greyish)

* Ak sentsü ya aika tepui asür.

OLONG PAITEP # 7203

1	2					3				4
					5					
	6									
7					8					
									9	
10			11				12			
					13					
14										
							15			

TIPIEN

1. Temang nung sü enok - 4
5. Sentep anisang - 6
6. Tenem masü - 6
7. Tzü tatsük agi yiru - 4
8. Ila masü - 3
11. Sü atakdang amshiba - 3
12. Ajunga - 4
13. Ali nungi ajungketa aou agi atemba - 6
14. Kotak _ _ _ _ _ - 6
15. Temolung tulu - 4

LANGTSÜNGLEN


2. Kasa masü - 6
3. Atentsü asoshi mejemba - 3
4. Ghonda metsür pezü - 5
5. Bilemteter - 9
9. Pi - 6
10. Nisung aika - 5
13. Tezüng asoshi metsüba shiruru - 3

OLONG PAITEP # 7202 TELANGZÜBA**TIPIEN :**

1. Tesüngjem, 5. Tetemsü, 6. Oru,
8. Rür, 9. Ozü, 11. Lemjem, 14. Anü,
15. Longkak, 16. Ashikülak.

LANGTSÜNGLEN :

2. Entsü, 3. Mersü, 4. Otia,
10. Zünga,
12. Jakla, 13. Maka.

NAI-A YA METETTER MA

Nüngtugu rock band Black Sabbath pur July 5 nü tatemsa Birmingham indang Villa Park nung "Back To The Beginning" ta nüngja agütsür live show ka nung shilem agiogo. Iba kentenba sentong nung arishi küm 76 tain frontman Ozzy

Osbourne tang tatemsa Black Sabbath tenzükba bandmate tem den longjemba nguogo.

Tony Iommi, Geezer Butler, Bill Ward, aser Ozzy Osbourne nungeri tatemsa live show ka nung shilem agiba reprangtsü atema nübur tem stadium sünga adenshia liasü.

Mizoram-i jena arubamapang Myanmar nung 4 arakseta asü

Aizawl, Chiteni/July 8 (Agencies): Chin National Defence Force (CNDF) züngsem asem densema Myanmar nung pezü Tiau ayong adena Mizoram-i aitsü merangba mapang taküm samaogo.

Item telungpurtem ya parnok teseap amakba ajanga jena aotsüba merangba mapang iba lendong ya Mizoram-Myanmar arrtsü nung atalok aliasü.

Chin National Army (CNA)-i amakba ajanga CNDF züngsemtem aser parnoki sota alirtem parnok indang Camp Rihli toktsür ajenba mapang arakseta asü.

Southern Champhai district nung Saikhumphai-i jena aotsü atema item nisungtem yagi tzü wadanga aotsü meranga liasü.

Vaphai yimtsüng nungi Young Mizo Association (YMA) lenirtemi ashiba agi, CNDF züngsem asem Deobarnü aonung ayong adenba mapang arakseta asü aser ano tangar ka Hombar anepdang arakseta asü.

Vaphai, Farkawn aser iba lendong atalokba tesem temeket nungi YMA volunteer temi tasü mang

bushia liasü.

CNA telungpurtemi amakba mapang Camp Rihli nung mi senoa rongtoktsü. CNDF züngsemtem ya mepudaktsü atema civilian süoshi semer jena liasü.

Ken o asadangertemi ashiba agi, CNDF-i Deobarnü CNA den sendaktepa aliba Chinland Defence Force (CDF)-Hualngoram indang teseap ti atsüngba atema telangzüba agüja iba teseap ya maka liasü.

Azütokshi lendong taliba küma aoba mapang Myanmar kübok Chin state nungi refugee 4,000 dak tema Mizoram nung jenoker lir.

Parnok 3,000 shi Zokhawthar Indo-Myanmar border trade center nung adenshia lir aser tanungba nisung 800 ya Vaphai aser Saikhumphai na nung jenoka lir. Mizoram-i arurtem rongnung CNDF züngsem 30 dak tema lir, ta YMA ketdangsürtemi metetdaksü.

CNDF aser CDF-Hualngoram na tsüngda rara ya July 3 nü tenzüka liasü.

Iba sülen CNDF-i, telungpurtemi CDF-Hualngoram teseap ti prongla maktokogo, kong Tuichirh

yimtsüng nung central base densema lir.

Telok ana tsüngda raratepba sülen CDF-Hualngoram züngsem ana süogo. Ka July 2 nü aser ka Honbarnü süogo. Teküzmükertemi yirur aliba telungpur pongu Zokhawthar-i anirogo aser parnok rongnung kabo tejak kanga mejungi yirur liasü aser pa ya Champhai district hospital-i yokogo.

YMA lenirtemisa, yirur aliba CNDF züngsem ana Zokhawthar nung temang anepalutsüba jangjatsüogo.

Mangatettep tali küma aoba sülen Zo Re-Unification Organisation (ZORO)-i Hombar nü sangdong ka ajanga, Myanmar kübok Chin state nung Mizo nung tsüngda mangatettep adokba atema süoki ia bilemba lemsatepogo.

ZORO-isa, iba amala azütokshi lendong ajanga Chin nungertem nüjiso asoshi nokdakba tetsükdaksü adokdaksütsü.

Maneni iba telok yagi telok anaprongla dang raratep anentsü aser mangatettep aliba bentettsü atema yimjung nung sensak asemtsü ayongzüko.

Assam: Dhubri nung ali azüngtetba mapang mepetmesü adok

Guwahati, Chiteni/July 8 (Agencies): Assam kübok Mongolbarnü Dhubri district nung sorkar ali atsünger aliba azüngtetja aoba mapang Chapar revenue circle nung mepetmsü adoka liasü.

Ali atsünga alirtem aser security force na tsüngda mangatettep adok aser parnoki sorkar tenzükertem maka liasü.

Adani Group-i thermal power plant ka yanglutsü atema benoker aliba asoshi ali begha 3,000 dak tema azüngtettsü nükjidong nung iba sentong ya tenzüka liasü.

District ketdangsürtemi ashiba agi, iba tesem nung alirtemi iba inyakyim anema nokdak tenzükba sülen mepetmesü adoka liasü. Longkak aitertemi police dak long ai aon aser excavator ka densema sorkar meyong oset balala raksatsüba ajanga security force temi item longkak aitertem azüoktsü atema jenjang agia liasü.

"Sorkar ali atsünger aliba azüngtettsü atema jenjang agiba nisung kari tashiyim amshia nokdangtsü meranga liasü. Police-i tensa azüoktsü aser nüburtem meyong kiojen aser osettsüt balala kümzüka

ayutsü atema takaratiba nung jenjang agia liasü," ta senior ketdangsür kati ashi.

Ajisüaka iba tesem nung alirtemi ashiba agi, parnok iba tesem nung joko putu aika alir. "Onok idaki küm aika alir. Onok tang koloni aotsü?" ta tetsür kati ashiba den tamangba yimsü dak ajemdaker lokti ka dak tenük yokba atema Bharatiya Janata Party (BJP) aija liasü. "Congress-i sorkar kümteter aliba mapang onok kecha tetsüba makai ali. Tang BJP yimsüsüba kübok onok mintoker," ta lai ashi.

Mepetmesü adoker aliba mapang Raijor Dal MLA Akhil Gogoi-i iba tesem semdangtsü merangba sülen pa police-i sota liasü. Ketdangsürtemi ashiba agi, security dak sendakba nung mepetmsü aliba ajanga pa ya sota liasü.

Kasa mapang nung Assam Housing & Urban Affairs Minister Ashok Singhal-i social media post ka ajanga iba tatalokba aitsüogo. "Chapar eviction drive mapang Police aser ketdangsürtem amakba aser osettsü balala raksatsüba ya

agizüksü makoktsü. Ozüng alema ali atsünger alirtemi ozüng benoka inyaker amakba ajanga parnok nem political teyari agütsüba sayur," ta pai ashi.

Chief Minister Himanta Biswa Sarma-i, Dhubri aser Goalpara district nung sorkar ali aser arem atema wazüka toktsüba ali meyipa agitsü sorkar bendang agütsür lir, ta nenshia metetdaksüogo. Paisa, ozüng alema state-i arua alirtem nungi ali kümzüka ayutsü aser lisopurtem temeden wazüka ayutsü atema iba sentong ya benoka inyaksü kanga tongtibang lir, ta ashi.

District ketdangsürtemi ashiba agi, Dhubri kija nunga yimtsüng asem nung kibong 1200 nungi 1400 tsüngda mintokogo. Maneni iba hopta tatemi Goalpara nunga kibong 1,100 shi mintoka sorkar ali 1,040 bigha azüngtettsütsü sentong lir.

Ketdangsürtemi ashiba agi, temzüng ozüng dak ajemdaker tinyaksü maparen ajak inyakogo, kong iba sentong agi kongshitsü aliba kibongtem nem jelia osang agütsüba densema lir.

Office of the
Chuchuyimlang Kaketshir Telongjem Mokokchung
Mokokchung - 798601: Nagaland

TENÜNGSANG AGÜTSÜR

Nagaland Staff Selection Board (NSSB), Clerical & Allied Service Examination (CASE) 2024, tatidang agiba nung Kaketshir asemi takok tajung bener arutsüba asoshi CKTM ajanga pelaba metetdaksür.



Sd/-
Imsutoshi Pongen, President

Sd/-
Sungjemnungla Pongen, General Secretary

1. **Sb. Lemdongmeren**, S/o Mr & Mrs. Kikumsungba, LDA Cum Computer Assistant (District) State Taxes Department.

2. **Kr. Aosangla C Jamir**, D/o Dr. & Mrs. J. Chubatemsu Ao, LDA Cum Computer Assistant (Directorate) Nagaland State Transport.

3. **Sb. Tongpoktoshi**, S/o Mr & Mrs. Imtikumzuk, LDA Cum Computer Assistant (District) Works & Housing (NPWD)

Tsüngremi nenok taküm aser wadang nübur ajungtsü mechi maneni amshiangma, aji asen CKTM lanur tamang sarasadem.

Alimai 'emperor' maginer: Brazil Tir Lula-i Trump aitsü

Rio de Janeiro, Chiteni/July 08 (Agencies): BRICS telok indang "anti-American" policies den lirumedema inyakba linüktem nem tariffs shilem 10 tali meshitsü, ta United States-i amokmerenba sülen Brazil Tir Lula da Silva-i meyiper US Tir Donald Trump aija alimai "emperor" menüngdaker ta ashi.

BRICS den sendaktepba linüktem dang tariffs talila shilem ter meshitsü ta Trump-i sangdongba sülen Lula-i iba o ya ashi. BRICS nungya India, China aser Russia lir.

"Linük kari danga BRICS indang Anti-American policies den lirumedema inyakra ADDITIONAL 10% Tariff meshitsü," ta Trump-i pa indang Truth Social nung lemsatep.

Brazil nung BRICS senden tatemi osangbener senden ka nung jembidang, "Alima melenshiogo. Asenoki emperor maginer. Asen linüktem ya sovereign lir. Trump-i tariffs meshira, danga linük temia kasaji inyaktsü temeden lir. Yangji reciprocity law lir," ta Lula-i ashi.

"US ama linük ka nungi tir kati social media nung tariffs agi alima amokmerentsü ya tim masü ama nibo bilemer. Tiri danga linüktem den jembitsü asoshi danga forums tema lir."

BRICS telok ya dangar den tokteptsü asoshi masü saka politics asoshi model ka dang süner ta Brazil tiri ashi. Hombarnü Trump-i linük 14 dangi shiti züluba nung tariffs shilem 25 nungi 40 tashi meshitsü metetdaksüba mapang Lula nungi iba o ya arur.

Trump-i amokmerenaka pa indang administration-i tangsa tangbo BRICS linüktem dang tariffs shilem ter tali meshitsü tebilemba mali, saka "anti-American" policy amshir ama ajitetba linüktem dang meshitsü ta ashir.

Osangbener senden ka nung tasüngdangba ka langzüdang, Trump-i BRICS senden ka kanga junga repranga lir aser item linüktem ya tashi taitba kuma ainer masü saka US tejangraba nung timtem agütsütsü meranger amai

Molungnen O



ASO :
25/6/1977

ASU :
3/7/2025

Onoki teti meima aliba Asür **MERANGTEMSU** (MOPUNGCHUKET) akumulir wadang tembanger onok temulung zürepa aser mangyima alidang ozü dang temeim sayur ajunga dang kinungertemi pelaba lemsateper.

Nenok sarasadem, nübu aser rongsen tenla tulu ajanga onok nem tashi aser ozü mulung nung anisüngzük agütsüogo.

Alakteta item dang pelaba lemsateper:

1. Aoyimti Baptist Church.

2. Aoyimti Village Council.

3. Mopungchuket Senso Telongjem.

4. Dr. Utina Kichu.

5. Doctors and Nurses of Zion Hospital.

6. Govt. HSS, Singrijan.

7. Kidanger, kinger, tembar aser temulungertem.

Nenok kija shia dang ozü tepela melemsatepteter, saka asen Tulusang Tsüngremi nenok ajak moajang ta sarasademtsür.

Temeim kinungtsü, chirnur aser kinungertem.

IMINUNGBA SEMCHIR TELONGJEM
UNGMA IMPANG



Nungsang Akütsür

Mr. Marpokba Jamir aser Mrs. Akokla Tonger na jala Miss Suyimzenla-i NSSB tatidang nung takok tulu nguteta, Department of Works and Housing (NPWD) nung LDA jenjang ajangzukteta asen Kin ajak asoshi konang nungsang tulu bener arutsü nung asen Kin-i onsara pelaba lemsateper.

Nai nukjidong tulu yur mitsa mainshi bendanga agütsür Tsüngrem dak yimla aposoba sungjang tanu alimai angur aser lanu asensor aika asoshi na takumji tatishitsü ka asütsü. Na tanu iba jenjang tongtetba ya na atema dang masu saka kinunger ajak asoshi konang tulu ka lir.

Wadang tasen nung ajemoka nuburtem tenzuktso asoshi mangdang tulu yur aposodang Tsungremi na takum aser mapa nung len ania shisatsu moatsuba nung nuburtem asoshi na takum temoatsuba sudakjang ta ozu sarasadem.

Zulumanen Jamir
Tatar

Imtsük Jamir
Tatar

Gaza nungi Palestine nunger belentsü atema Netanyahu aser Trump jemb

Washington, Chiteni/July 08 (Agencies): Israel Ato Kilonser Benjamin Netanyahu-i White House nung United States Tir Donald Trump ajurutepe Gaza Strip nungi tashiyim agi Palestine nunger meyirijang aika anidoktsü indang mangatettep aliba ken o maneni jembia liasü.

Trump aser Netanyahu na Hombarnü White House indang Blue Room nung chiyongtsü atema ajurutep aser Gaza nung ita 21 raraba tembangtsü asoshi US-i yaria anogo 60 ceasefire alitsü onük nung Israel aser Hamas tsüngta Qatar nung jembishinüba nunga teimla tajung sayur.

Iba senden nung aliba osangbener dang, Palestine nunger tarutsü tia tajungba agütsütsü asoshi US aser Israel nati danga linüktem den inyaktar, ta ashi, anungji Gaza nung alirtem ya kidanger linük temi yoktsü akok ta angateter.

"Nüburtemi yangji linera, parnoki litettsü, saka parnoki ainshinüra, parnoki ainshitettsü. Ibai tepuokdak ma masütsüla. Iba tesem ya lapoka alitsüla aser nüburtem pei mulung

südaksütsüla," ta Netanyahu-i ashi.

"Palestine nunger nem tarutsü tia tajungba agütsüner ta teti jembiba linüktem ngutettsü asoshi onoki United States den kanga junga teka amteper inyaker. Linük karbo tangor amai bilemer."

Trump, shibai küm tetenzüklen Palestine nungertem tesem balalai yoker Strip ya amokbanger "Riviera of the Middle East" kumdaksütsü tangatetba lemsatepdang Palestine nunger aser linük aika kanga ain adoktepa liasü, pai iba ken o nung temeket linüktem nungi junga amalitep akar ta ashi.

"Langka tajung kar ataloktsü," ta pai ashi.

Taoba Israeli diplomat Alon Pinkas-ibo Gaza nung aliba Palestine nungertem danga linüktemi yoktsüba indang osang aser sangdong liaka, item ya asangsang sentong masü, ta ashi.

"Israel defence minister mesüra ato kilonser, mesüra United States indang tiri ideas kar lemsatepaka ibaji sentong ka masü. February ita tetenzüklen

Trump-i Palestinian Riviera indang jembia aser ghonda 36 tsüngta pai ibaji melenshia Riviera for the Palestinians ta jembiba melen Palestine nungertem meindoktsü ta akum," ta Pinkas-i ashi.

Qatar nung indang-indanga mesüaka Israel aser Hamas ken o jembirtem ananü buba ki kasa nung süaka takdang balala mener jembishinüba mapang Trump aser Netanyahu ajuruteper.

Anogo 60 atema rara anena alitsü benokba nungya Hamas-i pua alir aser Palestine nunger tepuokdak alirtem chioktsü, Israel sepaitem Gaza tesem kar nungi ainshitsü aser teti atema rara tembangtsü jembishinütsü sentong lir.

Ajisüaka ceasefire ajanga rara ya teti asoshi tembangtsü asü masü ta asüba onük nung rangloka lir. Palestine nunger tepuokdak alir ajunga chioka Israel sepaitem ajak Gaza nungi ainshira pua alir ajunga chioktsü mulunga lir ta Hamas-i ashir. Ajisüaka Netanyahu-ibo Hamas nunger surrender süa nok-nü yutsür bendang lima nung jenokba sülen ang rara

tembangtsü ta ashir, koba Palestine nunger telok yagi memulunger.

Netanyahu-i US semdangtsü lia Trump-i tan hopta ceasefire ka yanglutsü ta takzüteta lir. Ajisüaka Netanyahu-i miimshir ama ajitetar aser Palestine linük balaka malitsü ta ashir aser Israel-i teti Gaza Strip security azüoktsü ta ashir.

Qatar nung Hombarnü jembishinüba sangdong kata magütsüi tembang. Trump indang special envoy Steve Witkoff, shibai anogo 60 ceasefire alitsü proposal yangluba nung tongtipang shilem agia lir, pa tan hopta Qatar nung oa ken o jembiba nung adentsü imlar.

Hopta ana tejakdang Trump-i Israel yaria Iranian nuclear sites nung bomb pokloktsütsü totuyuba agüja liasü aser iba sülen Israel-Iran anogo 12 rara nung ceasefire sangdong.

Trump aser Netanyahu na White House nung ajurutepba mapang Israel PM-i shiti ka US tir nem amoktsü aser iba shiti ya Nobel Peace Prize atema US tir nominate asüba nung amshiba

lir ta ashi. Iba mapa ajanga Trump ya pelar ama ajitet.

India aser Pakistan tsüngta aser Democratic Republic of the Congo (DRC) aser Rwanda tsüngta par administration ajanga rara anendaktsü ta jembir aser Trump-i Nobel aginüba ya kangabo miimshia malir.

Iba senden nung Iran ketdangsür temi US den Iran indang nuclear programme indang jembitsü asoshi asüngdang ta Trump-i ashi. Ken o April ita nungi tenzüka jembia, saka Israel-i taoba ita amakba ajanga anenadok.

"Iran den jembishinü akatsü anogo latetogo, aser parnoki jembiner. Parnok takoksa kanga nguogo," ta US tiri ashi.

Trump den langpang kasa nung mener Witkoff-ia senden ya hopta ka tsüngta amentsü akok ta ashi.

Iran Tir Masoud Pezeshkian-ia US journalist Tucker Carlson den sensaksemba Hombarnü sayaba nung, Tehran aser Washington tsüngta mangatettep aliba tem jembishinüa angatetteptsü südi ta amanger, ta shia liasü.

Poomsae coaching camp tenzükogo



Kohima, Chiteni/July 8 (TYO): Nagaland Taekwondo Association (NTA)-i ayongzüka anogo 11 atema Poomsae Coaching Camp tenzükogo. Iba camp ya Indira Gandhi Stadium, Kohima nung agidar aser state kübok tesem balala nung Taekwondo trainees 70 dak tema adenshir lir.

Camp nung shilem agirtem ya IG Sports Academy nungi asayartem aser district balala nungi educational institution aser Taekwondo club tem nungi asayartem densema lir.

Camp ya Mongolbarnü tenzükogo. Camp ya Arunachal Pradesh nungi nungtugu Taekwondo coach Master Ranjit Biswakarma aser pa den tanga trainer anati achaayanga agidar.

Master Ranjit, shiba 4th Dan Black Belt ka lir, pa ya national referee ka aser national asayamung nung medal trok tashi ngur aliba asayar ka lir. Pa nem India Best Poomsae

Coach Award anaben tashi agütsüogo aser pa national aser international jenjang naprongla nung toktepogo.

Camp lapokba sentong nung o jembiba mapang Master Ranjit-i, camp nung densemba atema pelaba den Nagaland nungi Taekwondo asayatsü jangraba lanurtem nem tangazükba agütsütsü yongya ataba lemsatepa liasü.

"Ni tang mezügbuba Nagaland nung Poomsae coaching camp ka nung shilem agir, aser ni idaki aruba atema kanga pelar. Ni Arunachal nungi lir saka kidang ama dang bilemer," ta pai ashi.

Kasa mapang nung NTA tir Pele Khezhie-i, trainee tem dang maongkatem takokba tashi agütsü ajungshia liasü.

"Asenok master dang nungi takokba tashi angazükang. Nenoki angazükbatem pei district-i bener oang aser Poomsae asayaba yimya shitakba sayuang," ta pai ashi.

Khezhie-isa, iba camp

ajanga state nung Taekwondo asayartem kanga ajangzüksü ta tamang akaba den district ajak nung iba asaya ya akangshitsü atema teyari agütsütsü, ta bilemba lemsatep.

Maneni NTA tir-isa, Directorate of Youth Resources and Sports aser NTA nungi ketdangsürtem iba hopta Memorandum of Understanding (MoU) ka nung sign asütsü atema South Korea-i aotsü ta metetdaksü.

Iba tenangzüktepba ya Taekwondo asaya ajungkettsü aser state nung training infrastructure tajungba küma yanglutsü atema South Korea nungi mongintem anir arutsü atema yanglutsüba lir.

Master Ranjit aser par team pelashishia agizüka, Khezhie-i ashiba agi, parnoki teyari agütsüba ya Nagaland nung Taekwondo terenlok atema alizüng tasen ka tongtetba ama bilemtettsü.

Krafton India nungi team kati Nagaland semdang

Kohima, Chiteni/July 8 (TYO): Battlegrounds Mobile India (BGMI) amala nungtugu game yangluba company Krafton India nungi team ka Nagaland-i arua lir.

Parnok ya kaketshir, tesayur aser local local stakeholder tem den sensak asemstü aser eSports indang tangazükba agütsütsü aser iba wadang nung career atema maongka aliba indang metetdaksütsü nükjiong nung Nagaland-i aru.

Team nung Saurabh Shah, Head of People Operations, Karan Gaikwad, Product Lead for BGMI aser Manva Hunswadkar, Lead PR densema lir aser parnoki college kaketshirtem den session balala ayongzüka agiba den India nung Krafton indang mapa indang lemsateper aser gaming ecosystem nung invest asüba aser Northeast nung parnok tejangraba aliba indang lemsatepa arudar.

Tongtibang yimitem nungi pila-a oa awajema inyaksü sentong aliba nung shilem ka ama parnoki Nagaland semdang ta Hunswadkar-i Mongolbarnü osangbenertem den sensaksemba mapang ashi.

Saurabh Shah-i ashiba agi, Kohima nung anogo ana atema skill development workshop ka nung shilem agütsü atema CII aser IDGS-i Krafton jaoka liasü.

"Onoki linük kübok tesem balalai onüa liasü aser Nagaland shim. Gaming ya asayaba dang masü saka career atema maongka tajung ka

kümogo," ta Shah-i ashi.

Krafton ya state den India Gaming Incubator program ajanga sendaktepatokogo, kong Kohima nung amendaker aliba team 3D-dimension Games tang parnoki nongita yaridar.

Local lanurtemi lapokba studio nung ya tang Krafton indang incubation program-i teyari agüja game tem yangludat.

Engineering college ka semdangba mapang, kaketshirtem tangazükünba aser parnok shisatsü aika aliba ngua Krafton team kanga temulung süa liasü, ta Karan Gaikwad-i ashi.

Team-isa, Nagaland nung aliba lanurtem aika active gamer tem lir aser aikati BGMI aser Mobile Legends amala asayaba parnoki repringtetogo. Manwa-i ashiba agi, iba tesem gaming dak tera yangloka aliba ya temaitsü tajung ka lir.

Krafton-i, India ajanga nung college tem nung eSports aser gaming ajungkettsü atema Campus Tour program ka ayongzüka agir, ta Manva Hunswadkar-i ashiba den iba inyakyim ya Tier-2 aser Tier-3 yimitem dak rangloker inyaker ta shisem.

Team-i ashiba agi, taruba round nung Nagaland nung aliba college tem pelshishia inoksemstü.

Parnokisa, state sorkar aser talisa Hornbill Festival amala mapang longjemer inyaksü tejangraba aliba lemsatepogo.

Kohima nung Tetsürtem atema badminton coaching camp tembangogo

Dimapur, Chiteni/July 8 (TYO): District Administration den District Hub for Empowerment of Women, Kohima (DHEW) aser Kohima District Badminton Association (KDBA) na longjemer Beti Bachao Beti Padhao (BBBP) kübok hopta ana atema Badminton coaching camp ka ayongzüka agiba July 7 nü tembangogo.

Iba camp ya Indoor Badminton Stadium, Thegabakha, Kohima nung June 23 nü tenzük aser July 7 nü tembangogo.

Coaching camp shibangba sentong nung Kohima Deputy Commissioner B. Henok Buchem, NCS alakteta jaoker liasü. Sentong nung o jembiba mapang paia asayartem dang camp tem



aser iba amala sentong nung tena pei tejangraba kechi aser kechi nung sempet ali aji jangjtsü kanga tongtibang lir ta ashi.

Paisa, camp nung shilem agirtem dang, saisabong nung pei sempet arangtetshiba mapang kakat shisatsü bushiba nunga temaba jenjang tongtettsü ajungshia

liasü. Pai, iba camp ajanga asayartem badminton asaya nung medal aser award tem ngua Kohima district nem konang tetushi bener arutsütsü imlaba lemsatep.

Kasa mapang nung Gender Specialist, DHEW Kohima Kesoneinuo Kense-i, BBBP scheme aser inyakyimtem metetdaksü.

Women Secretary, KDBA-i Khriekuonuo Khezhie-i coaching camp indang osang agütsü aser ashiba agi, iba coaching camp nung arishi küm 8 nungi 15 tsüngda

alirtemi shilem agi ,aser nungdaka alirtem nem sports shoes aser racquet agüja liasü.

Maneni coaching camp nung shilem agirtem nem shilem agiba kuli kakat aser senpet agütsü. Sentong nung anküp o ya VP, Administration, KDBA, Kekhrie Pfukha-i jembia liasü.

Coaching camp shibangba sentong ya Secretary, KDBA, Seto Khate lenisüng nung agi aser Chandmari Fellowship, Kohima Ao Baptist Church, pastor Dr. S.N. Among Jamir-i Tsüngrem temaotsü meshizüka sarasadema liasü.

BILEMDANGANG

"Temulungtetba dang lira ajak takoktsü."